

## PELAJAR 17

### NYEMBAH

#### A. MERKATKA TUHAN

“Puji Tuhan, semangat aku! Semua tubuh aku, puji nama Iya ti kudus!” (Masmor 103:1). Nyelai amat kita semampai ulih muji Tuhan ti udah ngagai kitai, tang ari jam ke jam kitai semina nemu ngereja iya aja. Kitai merkatka Iya nengah Puji enggau Sembah. Peda ba Masmor 34:1-3.

#### B. PUJI

Puji ianya kitai madah ka temengah ati enggau tanda meri terima kasih. Lebu kitai muji siko-siko orang, kitai madah ka ngagai iya naka pemadu manah iya ba kitai. Baka nya mega puji kitai ngagai Tuhan. Kitai muji Tuhan ketegal pendiau pengidup enggau kuasa Iya.

“Pengerindu Nuan ti meruan manah agi ari pengidup. Nya alai aku deka muji Nuan. Aku deka meri puji ngagai Nuan seagi-agi aku idup. Aku deka ngangkat ka jari aku lalu besembiang.” (Masmor 63:3,4).

#### 1. Nama Kebuah Kitai Muji Tuhan

##### a. **Laban Iya Endang Tuhan**

“Bepantun muji Allah Taala; nyanyi muji rajah kitai! Allah Taala merintah semua dunya; puji Iya enggau pantun!” (Masmor 47:6,7).

##### b. **Laban Ketegal Utai Ti Uдах Digaga Iya**

“Puji Tuhan, semangat aku! Semua tubuh aku, puji nama Iya ti kudus! Puji Tuhan semangat aku, anang enda ingat ka penelap Iya. Iya ngampun semua dosa aku lalu nyuman ka semua penyakit aku; Iya ngelepas ka aku ari lubang ti pemadu dalam lalu merekat ka aku ngena pengerindu enggau pengasih; Iya meri pengidup aku utai ti badas, ngambi ka aku seruran biak sereta kering baka menaul.” (Masmor 103:1-5).

#### 2. Sapa Orang Ti Deka Muji Tuhan?

##### a. **Orang Ti Ngiga Tuhan.**

“... sida ti ngiga Tuhan deka muji Iya magang...” (Masmor 22:26b).

##### b. **Semua Utai Ti Enseput.**

“Puji Tuhan, semua kita utai ti idup. Puji Tuhan!” (Masmor 150:6).

#### 3. Ni Maya Ti Patut Endur Kitai Muji Tuhan?

##### a. **Ninting Hari Enggau Dalam Semua Utai**

“Selalu gaga ati, besampi belama, selalu meri terima kasih dalam semua utai. Nya utai ti dikedeka Allah Taala kereja kita ba pengidup dalam Jesus Kristus.” (1 Tesalonika 5:16-18).

#### 4. Dini Endur Kitai Patut Muji Tuhan?

##### a. **Begulai Enggau Nembiak Tuhan Ti Bukai Dalam Gempuru.**

Munyi ko Iya (Jesus), "Allah Taala, aku deka ngenang pasal Nuan ngagai sida menyadi aku; aku deka muji Nuan ba mua orang mayuh ti begempuru." (Hebrew 2:12).

##### b. **Ba Semua Bansa.**

"Aku deka meri terima kasih ka nuan ba semua bansa, Tuhan! Aku deka muji Nuan ba semua mensia!" (Masmor 57:9).

##### c. **Ba Palan Peninduk Kitai.**

"Aku deka meri puji ngagai Nuan seagi-agi aku idup. Aku deka ngangkat ka jari aku lalu besembiang. Semangat aku deka lantang sereta gaga, lalu aku deka nyanyi pantun pengerindu muji Nuan. Lebuah aku gali, aku ingat ka Nuan; semalam-malam aku ngenang Nuan, laban Nuan selalu nulung aku. Di baruh sayap Nuan aku deka belagu enggau ati ti gaga." (Masmor 63: 4-7).

#### C. NYEMBAH

Lebuah lagu puji madah ka temengah ati enggau terima kasih, sembah ianya madah ka kasih enggau muja Tuhan. Kadang-kadang kitai temengah ati sereta beterima kasih ngagai siko-siko orang ketegal utai ti udah dikereja iya tang enda ngembuan pengerindu ka iya. Baka nya mega, sembah kitai bekaul enggau pengerindu kitai ngagai Tuhan ti ulih dipandang ka semina enggau nyerah ka segenap ati enggau pengidup kitai ngagai Iya.

"Mensia enda tau enda rindu ka Allah Taala enggau pengabis ati iya, enggau pengabis runding iya sereta enggau pengabis pengering iya; lalu iya mega enda tau enda rindu ka orang bukai asai ti rindu ka diri empu." (Mark 12:33a).

Pengawa pengarap enggau gawai ba dalam Penyanggup Lama siti pengawa ti dipegedi ka Tuhan laban ati sida ngejang ari Iya. (Isa 1:10-15; 29:13). Kemaya ari tu pen, Tuhan semina rindu ngagai sembah ti tuchi sereta sembah ti amat-amat pansut ari ati.

"Tang timpuh deka datai, lalu nya udah datai diatu, endur orang ti amat besembah deka nyembah Apai dalam kuasa Roh Kudus. Orang nya ti dikedeka Apai nyembah Iya. Allah Taala nya Roh enggau pemendar, lalu sida ti nyembah Iya enda tau enda nyembah dalam kuasa Roh Kudus enggau pemendar." (John 4:23,24). Bacha mega ayat 4-26.

#### 1. **Di Dalam Roh**

Sembah ti bendar nyadi lebuah kitai nitih ka iring Roh Kudus, mandang ka pengerindu enggau muja ngagai Tuhan. Utai tu ulih dipadaha ngena leka jaku ti disebut, lagu rindu ati ka Tuhan, tauka nyembah Tuhan dalam ati.

Sembah ti bendar beguna champur jari Roh Kudus ba roh kitai. Nya kebuah, orang ti udah 'diada ka baru dalam Roh' nengah pengarap dalam Jesus Kristus ti amat-amat ulih nyembah Tuhan. (John 3:5-8).

## 2. Di Dalam Pemandar

Nyembah Tuhan di dalam pendar ianya, nyembah Iya nitih gaya ti patut baka ti udah disebut dalam Bup Kudus. Nadab enggau Abihu (anak imam besai) mati laban nungkun api ti enda kusus ngelanggar adat lebu seduai ngadap ngagai Tuhan (Penyampau 3:4; 26:61). Cherita ti pandak tu cukup nerangka kitai patut belajar peneka Tuhan dalam ngintu pengarap.

Bempu ati ti nyerah ka diri, bebasu, ngiri enggau nuchi diri sebedau besembah. (Pemansut 30:17-38). Bala kita tau beratika di dalam Pemandang 1:5,6 ianya kitai '... dibasu ari semua dosa ulih darah Iya empu.' Sebedau diangkat ka nyadi imam Tuhan.

Siko Rasul/Guru di Amerika Syarikat ngelatih mayuh ketuai bakani ngeraika orang ti sakit sereta ngaga mayuh kereja nyelai. Lalu siko nabi indu madah ngagai iya: "Tuhan madah ngagai nuan, amat berani nuan ngajar sida ti enda kusus ngereja pengawa Aku! Anang ngereja ia agi!"

Mayuh bengkah utai ti dikereja ulih sida imam sebedau sida tama ke tempat kusus nyembah Tuhan. Nadai patut enti kitai ngelaung ka utai ti dipadahka Tuhan. Kitai patut nyembah di dalam pendar, nitih ka padah ba dalam Bup Kudus.

## PENERANG TENTANG PUJI ENGGAU SEMBAH DI DALAM BUP KUDUS

### 1. Ngena Mulut

- a. Belagu (Masmur 9:2,11)
- b. Muji (Masmor 103:1)
- c. Manjung (Masmor 47:1)

### 2. Ngena Jari

- a. Diangkat (Masmor 63:4)
- b. Betempik jari (Masmor 47:1)
- c. Kereban muzik (Masmor 150)

### 3. Ngena Perengka Tubuh

- a. Bediri (Masmor 134:1)
- b. Besugang, meremi (Masmor 95:6)
- c. Betanda sereta engkechit enggau ati gaga (Masmor)

"Tuhan, sapa petara bukai ti baka Nuan? Sapa ti baka Nuan, ti balat Kudus? Sapa ti nemu ngaga kereja ajih enggau pengawa ti nyelai baka Nuan? ... Bepantun ka Tuhan, laban pemadu besai pemenang Iya..." Pemansut 15:11,21).

"Nadai petara bukai ti sebaka enggau nuan, Tuhan, nadai siko orang nemu ngereja utai ti digaga Nuan. Laban semina Nuan aja Allah Taala, ti bekuasa; semina nuan aja ti ngereja utai nyelai. Aku deka muji Nuan enggau pengabis ati aku Tuhan, ti Allah Taala aku; aku deka nusi pemesai kuasa nuan belama-lama." (Masmor 86:8,10,12).

## **TANGGUNG PENGAWA AKU**

Perkara pepadu besai ti deka aku kereja ba pengidup aku tu ianya nyembah Tuhan. Aku netap ka saritu aku deka nyadi siko orang penyembah ti bendar sereta nyadika pekara tu tuju lumur satu ba pengidup aku tu. Aku deka ngajar ngagai orang bukai chara nyembah ti bendar.